



Revisiun parziala dalla planisaziun locala

Colligiaziun dils territoris da skis

Sedrun - Disentis/Mustér

M E S S A D I


dalla suprastanza communal a al cussegl da vischnaunca

Preziau signur president
Preziadas signuras cusseglieras
Preziai signurs cussegliers

Dapi liung temps discuoran ils exponents politics e turistics davart in project surregional San Gottardo. Ei setracta d'in project da svilup che duei promover cun sustegn dalla confederaziun e dils cantuns pertuccai la collaboraziun turistica sin differents secturs. Denter auter duein il sport da cuorsa liunga, denton era la collaboraziun intensiva ella regiun dil Gottard denter las pendicularas e las regiuns da skis vegnir intensivai.

In impurtont pass en quei sectur ei la fusiun dallas Pendicularas da Tujetsch cun las Pendicularas d'Ursera tier la societad Andermatt Sedrun Skiarena. L'intenziun ei denton era da colligiar il territori da skis da Mustér cun Tujetsch.

Marcus Weber, igl acziunari principal dallas Pendicularas Mustér SA, vesa en la colligiazion in augment considerabel dalla purschida turistica igl unviern, denton principalmein era la stad. Cun quella pendiculara duei buca mo la purschida pil sport d'unviern vegnir pli attractiva, mobein era igl access el territori da viandar e spassegiar vegnir completaus. Quei project sa era esser ina buna alternativa el cass d'unviarns cun pouca neiv el funs dalla val. Sper la colligiazion cun la pendiculara eis ei previu da realisar el territori dalla nova staziun da muntogna in rural enviers la staziun da muntogna dalla sutgera dil Parlet.




Legende

- Pendelbahn projiziert
- Schlepplift projiziert
- Zufahrt / Baupiste projiziert
- Bergrestaurant projiziert
- best. Skipisten
- zukünftige Skipisten
- prj. sep. Geländeengriffe


Per quei intent han las Penderas Mustér SA inoltrau agl uffeci federal da traffic ina damonda da concessiun per la realisaziun d'ina pendera naven da Salins entochen sil Pèz Las Palas. L'exposiziun uffiziala davart il project da concessiun ha giu liug naven dils 3 da fevrer entochen ils 6 da mars 2017.

Il medem temps ha giu liug l'exposiziun uffiziala davart dil plan directiv cantunal e regional Surselva sco era l'exposiziun publica da cooperaziun pertuccont la revisiun parziala dalla planisaziun locala.

Ferton che cantun e Regiun Surselva ein responsabels per la revisiun dalla planisaziun directiva, cumpeta la responsabladad per la revisiun dalla planisaziun locala - la planisaziun da nez - alla vischnaunca. La vischnaunca da Tujetsch ha per quei intent approbau alla votaziun all'urna dils 21 da matg 2017 la revisiun parziala dalla planisaziun locala concernent l'adattaziun dil plan da zonas e dil plan general d'avertura dalla vischnaunca da Tujetsch per la colligiaziun dils territoris da skis Sedrun-Disentis/Mustér (pendera Salins-Cungieri-Cuolm da Vi).



Adattaziun dalla zona da ruas



Plan general d'avertura

Project da revisiun

La gronda part dil project da colligiaziun vegn realisau sigl intschesch dalla vischnaunca da Tujetsch. Sigl intschesch dalla vischnaunca da Mustér setracta ei d'adattar la zona da ruas el territori dil Pèz Pardatschas e Parlet sco era in'adattaziun dil plan general d'avertura per realisar ina colligiaziun cun ina via da cultivaziun denter la staziun da muntogna sur Gionda Dadora ed ina lingia da provediment electric alla staziun da val dil runal a Gendusas Dadens.

L'adattaziun dalla zona da ruas ei in'adattaziun formala che vegn era sustenida davart dallas pendicularas. Tier la cumpletaziun dil plan general d'avertura setracta ei d'ina necessitad per saver garantir ina secunda lingia pil provediment electric d'ina vart e da l'otra vart per saver colligiar las duas staziuns cun ina via che po era survir il temps da terren sco senda.

Procedura

Sco gia menziunau ha l'exposiziun publica da cooperaziun pertuccont la revisiun parziala dalla planisaziun locala giu liug naven dils 3 da fevrer entochen ils 6 da mars 2017. Alla suprastanza communal ei enteifer quei termin vegniu inoltrau neginas propostas per midadas, aschia ch'il project sa vegnir suttamess allas autoritads per approbaziun.

Tenor art. 11 al. 1 dalla lescha da baghegiar cumpeta la competenza davart relaschar e midar la lescha da baghegiar, ils plans da zonas ed ils plans generals da formaziun alla cuminonza dils votants. Consequentamein ei la revisiun dil plan da zonas da suttametter alla cuminonza dils votants. Sebasond sin al. 2 dil medem artechel cumpeta la competenza per relaschar e midar ils plans generals d'avertura al cussegl da vischnaunca. Davart la revisiun dil plan general d'avertura decida pia il cussegl da vischnaunca definitivamein.

Ils conclus dallas duas autoritads communalas ein da publicar ed exponer publicamein. La fin finala decida la Regenza davart la revisiun parziala dalla planisaziun locala.

Sco menziunau ha giu liug il medem termin l'exposiziun dil plan directiv cantunal e regional sco era il project da concessiun per la realisaziun dalla pendiculara. Encunter la revisiun dil plan directiv ein pendent tier las autoritads cantunalas protestas.

La Regiun Surselva ha approbau ils 15 da matg 2017 la revisiun dil plan directiv regional pertuccont la colligiaziun dils territoris da skis Sedrun – Disentis/Mustér. Il project ei silsunter vegnius inoltraus alla Regenza per approbaziun. Finamira ei che la Regenza approbeschi l'adattaziun dil plan directiv avon las vacanzas da stad per ch'igl uffeci federal da traffic sappi cuntinuar cun la procedura da concessiun per la pendiculara.

Ponderaziuns finalas

Ord vesta dalla suprastanza communal setracta ei d'in project da gronda muntada per la destinaziun turistica Sedrun Mustér. Nus essan perschuadi ch'igl investur che ha inziau quei project ei intenziunau da realisar quel ton pli spert, sco quei ch'el ha era gia priu a mauns auters projects da gronda muntada. La vischnaunca da Mustér ha gia decidiu ils 27 da november 2016 da sustener la colligiaziun cun la pendiculara denter Mustér e Sedrun cun in emprist da 2.5 milliuns francs. Il pass logic ei pia quel da crear la basa planisatoria per che quell'ovra sappi vegnir realisada. Probablamein vegn ei ad esser necessari da surmuntar sin palancau cantunal (plan directiv) e federal (concessiun dalla pendiculara) in u l'auter obstachel avon che l'ovra sappi vegnir realisada. La vischnaunca sa cun quell'adattaziun dalla planisaziun locala tschentiar in ulteriur crap da cantun en favur da quei project.

Proposta

Sin fundament dallas ponderaziuns suramenziunadas

propona

la suprastonza communalala al cussegl da vischnaunca:

1. d'approbar la revisiun parziala dalla planisaziun locala concernent l'adattaziun dil plan da zonas e dil plan general d'avertura dalla vischnaunca da Mustér per la colligaziun dils territoris da skis Sedrun - Disentis/Mustér (pendiculara Salins-Cungieri-Cuolm da Vi);
2. da suttametter la revisiun dil plan da zonas el senn digl art. 11 al. 1 dalla lescha da baghegiar alla cuminonza dils votants.

Suprastonza communalala Disentis/Mustér

Il president:

Il canzlist:



Robert Cajacob



Andri Hendry

Disentis/Mustér, ils 29 da matg 2017